

四庫全書

集部

欽定四庫全書

文簡集卷五十二

明 孫承恩 撰

墓誌銘

封徵仕郎兵科給事中南河孟先生墓誌銘

先生諱瑛字時閏號南河世為霸州人大父安仕為南
昌府照磨父欽遇例冠帶母苗氏先生自少穎敏長而
好學肆力載籍補州庠弟子員綽有時名久之貢於京

擬赴選銓部或惜其小就多阻之先生曰已矣吾之弗
偶也吾極知青蘊淡薄然猶幸列職文儒不猶愈於為
俗吏奔走服役上官耶於是得山西興縣學訓繼又擢
掌教應州初先生既屢蹶場屋顧其子給事廷相曰吾
讀書繢文未嘗敢後人而卒不售然幸有汝可畢吾事
由是勤於訓迪廷相卒舉進士為天子諫官至受興應
學職曰吾推所學為朝廷育賢才以効用於世亦可不
負此生矣開導振作文教大行興應二地人材彬彬出

馬先生仕凡十七歲而在應之日多大得士心給事君
既第奉詔歸省因迎養來都下應之士人固留弗得遂
以學職致其仕久之朝廷以太廟成覃恩羣臣先生得
誥封如子官未幾給事奉勅使代侍先生便道歸家忽
遘疾不起先生天性孝友父病痢且劇先生侍湯藥四
十日不少懈父苦索桃鑿法當忌先生不能違禱神以
進挑入口而病脫苗氏患癰鑿謂不治先生拜泣懇之
鑿試用解散藥竟不潰而愈人謂其孝感所致父歿為

二弟珣塘畢婚娶如禮父遺業悉讓與弟鄉邦稱之先生生於成化壬辰十月十一日卒於嘉靖二十六年九月十一日得壽七十有八配胡氏子一即廷相於是廷相將以某月日塋先生於西岡之原丐其同寅呂君時中狀過予請銘丁酉歲予主順天鄉試廷相泊時中皆予所舉士時中之狀覈而不浮可徵也故得備錄之銘曰

仕有祿位不必官之尊也學有紹述不必身之親也封

章有赫徵天道之卒伸也令德考終亦不媿於完人也
刻銘埋壚千百載其弗湮也

吏部右侍郎兼翰林學士虛山席公墓誌銘

少宰學士虛山席公以嘉靖十五年十二月廿六日卒
其塋也未有銘越十二年姪尚寶君中乃具其事行授
予為文刻石昔公伯兄文襄公為世名臣嘉靖初為今
天子伸大議定大禮贊成大孝承恩未及識而竊欣仰
焉乃幸獲交於公同官詞林侍講幄既乃同校文應天

公開獎質直能推誠相與受公知愛最深豈敢以不文辭公諱春字仁同別號虛山世為四川遂寧人系遠譜失莫考斷自七世祖友軫友軫生復字無悔號橫岡博學能文受業元吳草廬氏隱居教授於鄉實以文學為遂寧倡國初舉賢良授潼川學訓導復生汝霖汝霖生思恭思恭生暄暄生祖憲則公考也配吳氏後以文襄貴贈三世皆如其官吳封一品夫人公自童稚即儼然如老成人強毅有操執祖每異之曰他日必能負荷大

事及長與弟給事君彖從文襄公學丁丑舉進士改翰林庶吉士武宗潛幸居庸闕廷臣屢疏莫回中外人心惴惴公上書內閣欲乞兩宮懿旨遣中使迎駕還宮而館閣府部百司各以一二居守餘俱趨行在祈請務必得然後返否則從此巡遊南北國事滋多憂其始矣識者是其言尋授河南道監察御史出按雲貴釐革軍政凡錢穀刑獄欺蔽被罪者無怨吏役假冒至七百餘皆罷斥莫能逃者時黔國總兵交結近倖威權日甚藩臬

每被訐論臺中有叅其假公言以結民心恐為將來專
主之漸得罪下獄外謫黔乃益驕橫公至痛為裁抑家
人干紀殃民者悉縛致論罪馬進士某以罪謫戍金齒
潛入總府克記室凡章奏公移多出其手憑籍冒例為
都指揮公廉得之至是偕衆叅謁與見任無異公執之
褫其服仍發隸原伍指揮王喬稔惡為衆所嫉當道者
莫能治至是亦論以法滇南為之肅清今天子登極疏
上時政興革利弊多符詔款人稱其有經濟之具尋以

文襄公職中丞改翰林院編脩癸未殿試克彌封官脩
武宗實錄克纂脩官書成陞脩撰丙戌會試為同考試
官尋克經筵展書脩明倫大典仍與纂脩書成陞侍講
學士賜金帛文綺克經筵講官聖天子勵精治理考古
帝王所以圖治簡命公與二三詞臣經筵外復進講西
山真氏大學衍義每寵錫大僚公必預辛卯主南京考
試多得名士己丑壬辰殿試克讀卷官隨擢翰林院學
士掌院事克經筵日講官未幾擢禮部右侍郎癸巳秋

轉吏部右侍郎文襄既受宸眷上後知公為文襄弟乃於諸侍從中顧公獨厚擢翰學擢吏禮二侍皆簡自聖衷於是頗為時所忌公既感上知遇益思報稱在吏部數與冢宰誠齋汪公議不合司屬復有肆間者二公乃遂失歡寢成隙汪疏公起用大禮遷謫諸臣又誣公不賀皇太子誕生等事疏入命下公冠帶閒住即日陛辭怡然就道人勸公論辨公曰吾惟無媿於心耳又何辨且吾老無子得歸素志也渭崖霍公繼為少宰汪尋去

位凡公所欲更置者悉見施行後臺諫論汪陷害僚屬
蓋指此云公家居杜門謝客絕口不及朝政時與二三
故舊登涉玉山涪水之間嘯咏竟日邑故稱淳朴後漸
事侈靡公歸敦儉素表率鄉閭俗因以變公卒之冬今
皇太子生詔下凡冠帶間住者得准致仕例閭里走賀
且謂公還朝有日公曰吾得沐聖恩足矣幸未死扶杖
擊壤以樂太平耳更何冀也公時以哭女病且亟猶力
疾開讀未幾卒屬纊無他言惟以受上恩不能報為恨

公性剛果志欲有為每與人論事侃侃無詭隨意樂道人善然有為不義者亦必面折之用是取怨於人為文平正通達詩亦純雅不尚新奇晚喜字學習草書多有法談論古昔政治得失人物臧否動中肯綮公業既晚成益明習當世事雖職居論思而諸司所隸無不留意尤切邊務予嘗見其論諸邊道理險塞與屯守之要歷歷若指諸掌在經筵多啓沃每遇治道大端君子小人進退反覆三致意嘗勸上惇用故舊上感其語因起用

大臣如鳳山聶公其一也遇講前一日必焚香設案盛服北面如在上前演習數四當事謹恪如此文襄自入仕僅一乞省歷更內外即不得告公家居事親脩孝養文襄得殫力王事不牽內顧事文襄極恭巨細事必咨稟二兄早逝撫其遺孤俾克樹立矧恤族人貧匱者儉以處家雖貴顯衣無華飾食不兼味每詔子姓以家世儒素後人要無失秀才家風味公立志勛業方期柄用乃以阻阨去使獲究竟其展布當必有卓越可觀者配

黃氏生子志早卒女一適譚同知子生員偲繼娶陳氏
全氏皆無出以姪忱為嗣公貴蔭為國子生公生成化
壬辰年四月二十三日距卒得壽六十有五年月日葬
於傘子山之麓中書君之屬予銘也予諾隨以病因循
者又三年念公才識器局隨試輒已彪炳獨其去位之
故人莫悉也故述以為銘然即是亦得公之大矣銘曰
惟古君子仕也不苟居位行志惟義是守忘已徇人彼
則謂何匪也則闇匪也則阿侃侃虛山質厚行恪衆方

諾諾乃見諤諤我匪求異惟心所安敢曰惟吾言則穀
不敢不殫莫或諒只則予是病行或尼之業也弗竟長
材偉志閔茲一丘爰刻銘章以告諸幽

贈通議大夫都察院左副都御史石山周公墓

誌銘

中丞弓岡周公煦嘗以其所謂三窮卷者乞詩於諸士
大夫承恩得悉其故而深悲之他日則謂承恩曰惟我
先大父於煦鞠育教訓煦雖賴母氏勵節而非大父無

以成大父恩德照不敢忘顧未有撰述施之金石恐遂泯泯於後也照日夜痛心茲欲立石墓首惟吾子畀之以文承恩誌曰公諱某字時用以字行別號石山周系出吳周瑜後有居吉水者後復徙安福遂為安福人高祖存初曾祖蘭芳祖孟瑱皆不仕父資貴以子贈工部員外郎嫡母尹氏生母劉氏俱贈宜人公天性篤孝事父母得其懽心兄弟四人公最幼諸兄既析處并走仕途惟公早夜侍親側躬溫清久弗懈母病痢危甚公曰

吾聞病痢糞苦者生遂嘗之苦則幸喜母疾果瘳友愛
於諸兄先業惟諸兄意所便各擅有之公弗較居常怡
怡如也石山公惟一子卒時未有嗣而嬭姓公哭曰某
生平無逆天事天忍絕其祀耶越月中丞生公悲喜鞠
育周至中丞稍長督教之擇其與交者中丞幼年痛母
氏寡居依依膠戀不忍少離因頗怠學弗力公每對之
愀然中丞復親師友勤誦習則喜慰歲甲子中丞領鄉
薦先是年春公嘗遘危疾惚惚若逝去累日一夕復甦

竟獲見中丞文捷歸拜堂上稱觴為壽未幾中丞且生
子公親撫抱之嬉笑為慰人謂作善之報不爽云石山
公正直篤信少嘗習舉子中輟而明達理道習世故與人
交和而有禮治家不以嚴廢恩子姓弗循禮規訓之弗
少容公於義利甚析臨財不苟於取與至諸義事輒無
靳意親喪竭力助襄事獨多於諸兄人以為言曰人子
為親各欲盡心耳獨子者又將孰諉耶石山公處患難
能泊然順受見世務營植為後人計者曰是不有數而

乃欲以智力久持也族有侵其業者容之弗言亦不以語中丞嘗謂吾以垂絕之緒幸一脉少存遑恤其他且釁不可啓競敗之源也吾以是示吾後耳石山公可謂知命遠識之君子矣公配王氏邑之故族恪執嬭道實克相公而族之人亦莫不交舉其賢當喪子育孤日憂勤尤甚風雨之夕姑婦相慰藉至泣下聞者淒楚中丞少長每舉善事為訓中丞德業之就內教居多石山公既以孫貴贈通議大夫都察院左副都御史而王氏亦

贈淑人石山公生宣德丁巳八月一日卒正德庚午九月五日壽七十四淑人生於宣德乙卯二月念七日卒後公三年壽七十九合塋於里之楊村橋之原子男一梯雲君亦贈如中丞官娶許氏屢贈淑人旌表節婦女一適管某孫男一即中丞娶劉氏累封淑人曾孫男二坤中書舍人娶謝氏封孺人墀邑庠生娶王氏女三長適劉楷鎮遠府經歷次適劉某次適彭某俱邑庠生玄孫男二鍾官生鑑聘彭氏俱坤出紹祖聘歐氏墀出

來孫女一於是石山公卒三十五年矣嗚呼予嘗讀易而感於天人之際否泰剝復之禪續固天之為而所以承之者豈不係乎人哉以周氏觀之方梯雲贈君之沒石山公子然一身耳雖幸有遺腹之姪未保也石山公之祀不絕者如綫既而遺腹之姪乃得中丞焉此否極將泰時也夫升降之會聖人所深致意焉者故曰有命無咎無過而後可獲福石山公孝友篤行孚於神明至於保育中丞不以孤幼而怠教教必以正茹辛飲荼厲

志艱苦庶幾得否九五之戒懼則石山公之所以靈承
天意不有道哉是宜有中丞之克邁卓然勛德為時名
臣子孫其昌石山公之遺遠矣固當表出以詔來者并
系辭曰

猗嗟碩人志純一兮履道坦坦又正直兮屯難弗失神
所福兮無往不復保中吉兮有命斯皇龍章赫兮曾玄
鼎來永世澤兮

闕

樹茲刻兮石也可泐名不沒

兮

封文林郎山西太原府推官仁齋郭君墓誌銘

封文林郎太原推官仁齋郭君嘉靖癸卯七月一日疾卒先是其子惟清繫官所君思之甚居三載惟清以考績歸事竣當復之任詣予別而容甚感叩之曰清父老多病久別幸膠戀膝下即何能割去而時例三載或當有遷補便清乃濡滯於行恐言者謂有覬覦意清用是以悲予謂曰事固有輕重子亦惟心之所安耳矣子之所見者大何惜乎言也惟清於是留侍養者四閱月君

遂得封勅如前受姻戚鄉閭稱慶惟清稱觴膝下為樂
忽一日疾作遂不起惟清乃復持夏吉士子開狀謁予
曰清幸以先生教自安躬侍父考終乃今已矣不朽之
事亦惟先生圖之予不忍辭也誌曰君諱昇字景暘仁
齋其號也先世蘇人曾祖官孫以匠籍來居京師祖福
敬父泰母楊氏生三子長杲次昂郭氏素頗饒腴杲據
成業以不檢蕩廢君早失怙恃煢煢無依有楊氏者素
善君父求得君於里中愛其謹愿贅為婿楊無子欲君

易氏以應役君辭曰荷翁恩厚然令某背本則不可楊
不可強後益幹勤事楊惟謹楊卒殯斂以禮有內從兄
以貲拉君貿易未幾獲息數倍其人欲專之以他辭紿
君君弗與較自是愈自樹立業乃大充拓君天性孝友
既履亨裕以不及養親為恨痛親塋簡陋弗稱擇勝地
治塋域遷窆焉杲後落魄老且貧無子君迎養於家洎
昂友愛敦至撫其姪底成立悔少失學惟清甫垂髫即
遣令學甲午惟清薦於鄉君喜曰吾門百年來無業儒

者祖宗積德始發於子子其勉之洎舉進士授理官拳
拳以民命為戒惟清居官有政聲當道者累旌薦之君
詒書曰汝無徒善事上官而失百姓心也君嘗謂讀古
人書當畧倣古人行事彼有仕而積愆召戾非不讀書
正坐空言耳蓋其天資之美識達理道者如此個儻好
行義事賙恤貧匱若不及嘗以厚貲付段釗者營賈事
段沒復畀其子其子後背君德君優容之曰故人之子
能盡較乎純確和易與人謙謙然恒恐忤其意家庭雍

睦雖臧獲無詈罵言晚歲喜交遊雅善奕每偕三五知
厚携壺挈枰擇幽勝較藝飲酒為樂若蕭然物外云君
生於成化戊戌三月十七日距卒得壽六十有六配楊
氏封孺人以淑行聞子男三長即惟清太原府推官君
卒旬日擢刑部廣西司主事娶文氏封孺人次惟和治
生業娶任氏次惟一讀書志進取娶沈氏繼娶張氏女
三長適府庠生王大田次適袁淇次適袁大有孫女一
尚幼君卒越月是為八月二十日諸子奉君柩塋於君

前所治先塋之側在都城東北六里屯之原銘曰

起廢植仆上續下延孝友任卹實維汝賢野寺郊園詩
盟棋社幸茲清時以樂優暇考終維寧卜日窆藏爰刻
銘詩納于玄堂

濬涯朱處士并配林氏合塋墓誌銘

嘉靖丁酉歲予主順天鄉試得士曰朱天俸者今年春
予承乏主會試而天俸卷後入予取列於是天俸廷對
舉二甲進士未幾以繚經見予告曰天俸不孝荷先人

教育以成方圖一日之養而不幸先人長逝矣惟先人不學無所彰顯於世而其行義則亦有可述者敢以同年楊守魯狀謁銘於門下刻石壙中以為不朽計其意甚哀予不能辭也則為誌曰處士諱鑑字朝用別號濬涯世為濬縣舊族厥父榮徙居京師種德好義號稱鄉里善人識者謂其後必昌大生三子長鉞次即處士次銘處士篤於孝友前後執親喪哀毀備至家素寡薄當父初喪兄鉞亦以羸疾繼卒母且老弟幼嫂氏新孀遺

息僅八月家務雜沓處士極力勸早夜服勤賈事經營于四方漸致阜給奉母必具洗腆而母安其養事嫂敬而有禮育弟與姪顧復甚至故咸得所依而忘其為寡且孤也每時祀哀思如初喪對妻子涕泣終日弟銘喪婚娶維時兩為納嬪悉不敢殺於禮銘未幾亦卒遺女甫十歲為擇壻治裝如儀人許其義處士與人交質任自然不為城府人有過必盡言規戒之濟人之急押取十金不顧人有負之者亦不與較而阻其濟人之念

平生恒以失學為恨見文士則重之四方士有與計偕
僦舍於處士比隣者輒往訊問致款曲勸以簡出勤肄
習復令其子與之聚藝故四方多知處士名而感其善
意乃子之學益進處士性不喜緇黃不信陰陽鑿卜之
事而亦終身少疾病卒之先一日猶談笑如常娶林氏
柴氏而繼林氏事處士獨久助內事甚力處士前遭多
難每憂形於色林氏輒寬譬之及婚娶出簪珥為助宗
人稱其賢先處士幾年卒子男三長天祿林氏出次即

天俸次天叙繼林氏出天祿天叙先翁卒女一亦繼林氏出孫男一女四俱幼處士生成化壬寅四月八日卒於嘉靖丁未八月十三日年六十有六於是以月日即南城七里鋪之原啓林氏穴合塋禮也毅齋子曰予觀京師羣萃四方之人多役食公府兼逐什一之利謂亦足以緒厥生不知以教子讀書為務自非父兄之賢教其子者尠也教而成名者則又尠也處士上無承傳雖其所以謀生者無以異而獨不安於卑近拳拳於茲事

必欲其子之成以光顯其門戶其志亦可嘉矣豈非賢哉惜乎天俸將祿仕而處士不克少待雖然處士固已目見其子之成可以自慰於地下而天俸風木之悲則何時已也予故為之銘以慰之銘曰

制行無惡於鄉閭教子克登乎科第踐信不爽於初終守業足供乎賓祭祿養且及壽命弗長我撮其凡吁其可傷尚有寵章賁于玄堂

明故武畧將軍錦衣衛千戶奚君墓誌銘

奚君名耘字舜疇別號思南奚姑蘇人後僑居永平之遷安君之曾大父量隸南京錦衣衛小旗大父廣扈從文皇帝北遷陞錦衣衛總旗遂家京師廣號善人至今鄉里能道其姓字君父賢尤敏幹以積勞累陞副千戶長子耕遜襲君其次子也代補校尉正德間選送東廠緝事三年陞小旗又二年陞總旗嘉靖初掌衛事都督王松泉佐以君練達取東司房管事未幾陞百戶再陞副千戶尋推理西司房事君性謹飭敦厚緝事槩以多

辦為勞勩當正德間中貴橫行多植黨與緝事憑籍聲
勢專伺察鈎撫人罪迫脅誣罔以便已私殘賊良善至
破滅身家不之恤君獨存仁恕每日殺人以求功名彼
天者其謂我何不于子孫必于吾身吾不為也人以是
稱其賢洎管東西司房事愈恪慎讞獄明允弗縱弗枉
其名益彰君孝友甚至早失怙恃繼母楊氏撫育以成
君色養朝夕惟謹事兄怡怡恭遜事必稟而後行尤篤
教子延明師以訓每語子曰吾家世武胄女能勵志科

目以大吾門乎縱不爾亦庶幾能識道理不失為善人也君既以勤儉殷厥家好與賢士大夫往來客至盛陳酒肴欸留盡日乃已姻戚婚喪不克舉者為賙之至處僚窠御臧獲亦皆惠而有禮以是人無不愛敬君者嘉靖戊戌誥封武畧將軍元配董氏先卒贈宜人繼熊氏中烝熊公偉女封宜人子一鵠側室陸氏出娶國戚錦衣百衣指揮王棹之女女三一董出配知縣陳壠子錦衣百戶九德早寡以節自勵一熊出一媵張氏出俱在室君

生於弘治丙辰正月二十九日卒以嘉靖癸卯二月廿三日年僅四十有八將以三月二十九日塋於城南下馬社之先塋合董宜人之窀君兄耕令任正千戶號松月予雅與善君沒予往弔松月見其哭泣甚哀既則遣其子井鵠持鄉進士張允濟狀來謁銘予為松月誼不得辭也乃銘曰

官以慎居家以勤裕友恭孚於厥兄嚴教徵於其女壽弗稱德歸咎無處吾故與銘以詔來者

贈懷遠將軍錦衣衛指揮崔君墓誌銘

錦衣衛指揮崔玉喪厥母于氏太淑人將治塋事先是
厥考之沒塋未有銘乃茲屬夏官夏子開并述狀謁予
以請誌曰贈懷遠將軍錦衣衛指揮崔君諱文達保定
易州人也曾祖福原祖玘父敬皆不仕母丁氏敬生五
男子長文通次即君次文進次文遠以才能入內庭掌
內膳監事次文智文遠既列近侍貴顯得蔭庇其族人
于是其昆弟等俱例授散官玉又蒙蔭由校尉陞總旗

積功至指揮同知君因得贈官如其子君性質直不善
諛少未嘗問學然敏悟多識理道見儒生語古善惡事
可敬愛可畏惡可哀憐輒記憶不忘每為鄉人子弟談
說事至據理剖析是非枉直弗繆人以此服君稱曰崔
君能居家孝友伯氏早卒太監日近侍忠勤自勉不得
顧私家諸弟亦貧薄君獨竭力侍奉而均愛諸弟推太
監不得事親抱歎益致曲於親側以慰太監每語曰孝
以祿養為大旦夕定省其常也子為其大吾為其常又

何必區區膠戀左右而後為孝太監乃安之人稱君曰
崔君孝且友君居常接人以禮而誠實不欺御僕屬寬
慈有恩隣有貧乏者賙之如恐不及人又稱曰崔君仁
厚且賢賢者多福是宜有令子必得封君顯被名號為
鄉里榮而忽以疾卒不及待太淑人者處士聚之女幼
穎悟習女工既嬪克修婦道相崔君養舅姑慈孝如崔
君不責下人小過太監幼太淑人頗多顧復功太監懷
之每命玉迎養都下而太淑人亟求返但語玉以當思

富貴所自而致孝養於太監歸則課孫誦習督家奴力
穡事每曰吾世業則然樂鄉土不樂貴盛吾性也人於
是又稱太淑人賢賢必有壽太淑人乃壽至九十二歲
距君卒蓋二十一年君壽七十二歲與淑人俱生景泰
三年君九月初四日卒以嘉靖四年月日太淑人二月
廿八日卒以嘉靖二十四年月日子男二人長即玉任
今官娶程氏封淑人次堂錦衣冠帶總旗娶杜氏女一
適邑人路智孫男七人孫女五人俱婚聘名族銘曰

易水之陽土燥剛兮馬鬣者封闢玄堂兮有赫寵光發
幽祥兮福爾子孫其永昌兮

武德將軍錦衣正千戶松月奚君墓誌銘

予往嘗聞搢紳士道奚錦衣者洎識之見其恭謹誠確
不類武弁氣習敝衣羸馬不類貴介人作侈富態意其
以是見稱未幾君有弟之喪予往唁君見君哀甚又嘆
其克篤友愛君嘗苦風疾至是哭弟病增劇遂不起於
是君之子鶴奉君治命踵予謁銘嗚呼予前以君故銘

君之弟矣而茲乃不銘君哉乃叙曰君諱耕字舜田別號松月先世蘇人也高祖德元季旅寓永平之遷安曾祖亮國初以功隸南京錦衣衛小旗扈文皇駕北定都遂家京師祖廣以東廠緝事功陞總旗父賢弘治中選東司房辦事積勞陞實授百戶從戎延綏有功陞副千戶會同列有嫉譖之者改應天衛君既補襲痛父枉三上疏復職錦衣衛累陞正千戶誥封武德將軍君有幹局理刑西司房稱明決然持論每恕掌衛事都督王公

佐雅重之嘗委總馬政剗革宿弊人莫干以私嘉靖己丑天下臣工入覲君奉命同楊御史巡歷中路禁緝奸宄執事勤恪楊甚善之由是奚錦衣之名多為朝士搢紳所稱道而樂與交然謂其當漸向用而君志恬退未幾乞解職付子鶴承襲自是家居寡出故有亭館水石花木客過留觴詠盡日口不及公家事君性敏而質直當事有定見不為人揺杙好禮樂善祀先用朱子家禮少失怙事繼母楊氏盡孝治塋域殫盡心力建碑亭求

大學士顧未齋吏侍徐崦西文刻石表隧上延師訓子
豐其館穀若厚有望者疾革猶諄諄誨戒姻戚不能舉
婚塋賙之不責報至儉朴友愛則尤性成者屏華紛靳
浮費雖粟絲靡濫用弟抱病卒即以已夙置衾棺殯之
嘗出五百金為姪畢婚事而未嘗語人亦可謂難矣嗚
呼茲尤君之所宜稱賢歟君生於成化乙丑正月十三
日卒以嘉靖癸卯七月四日得壽五十有九元配萬氏
封宜人側室齊氏楊氏子一即鶴齊出襲錦衣百戶娶

僉事高君夔女先卒繼娶錦衣千戶邵君鏜女女四長
次萬出一適錦衣百戶孫君子瀚一適錦衣指揮謝君
子廷訓二幼女楊出一許聘邵君子源邵即鶴外舅一
許聘錦衣千戶蔡君子綜十二月廿七日塋城南下馬
社祖塋之次鶴之謁銘也屬張舉人允濟具狀張於奚
姻親道君詳而覈予既雅得君善又張狀可徵故具列
銘曰

嗟嗟奚君克自樹也繫能於官厥績著也柔弗茹也剛

弗吐也抱樸履儉儼儒素也天顯是敦卒罔斁也謝事
孔亟保終譽也馬社之原藏永固也子孫繩繩維永祐
也

訓導陳君并配霍孺人合塋墓誌銘

君姓陳氏諱良玉字彥溫別號栗軒先世河南杞縣人
宋時有為團練使者扈高宗蹕南遷寓上虞七世祖瑞
始徙仁和遂占籍高祖益中元餘杭縣主簿曾祖文舉
元平江路學正祖盾古田縣學諭贈文林郎閩縣知縣


父敏政字志行宣德丁未進士歷官南康府知府贈中議大夫贊治尹母鄭氏贈宜人君幼承家業治葩經弱冠充邑弟子員篤志攻苦講誦勤晝夜遂淹貫舉業每擬題命意錯綜條析各有攸當試占優等廩於有司然每就場屋即弗利坎坷者久之弘治壬子始貢禮部授都昌縣學訓導三年為丙辰十二月初三日感疾卒元配霍孺人故名家女父母擇所宜配歸君淑慎儉勤多內助功亦以是年先君卒為正月初七日壽俱六十三

云君天性醇朴愷悌與人無計較意既文戰累躋時新
進士輕獩者多務新體迎合主司雖叛戾經義不顧然
往往有售者輒自負才君獨謹守繩墨不敢變輕獩士
多目笑之歲貢必有正次君次當行某生者稔學不如
君懼以弗得因以苦語哀祈君請留君愍之即許諾明
年君貢當正次某者君姻戚也又以計懇君復信之讓
之行於是輕獩士即又目笑而其為君者則憤曰彼紕
子耳盍反諸君曰吾既許矣反之害信卒不反其為人

大率類是然君生平行誼甚脩寡過隱當南康公莅郡有惠政郡人尸而祝洎君職教都昌都昌南康屬邑也企慕先烈克振教事士類愛戴謂猶見南康公焉則君之所存又豈瑣瑣者與知哉然竟淹抑以沒弗克致通顯斯命也矣君生子二長守早卒次宰讀書弗仕以子克昌貴卒贈郎中大夫娶李氏封太宜人孫男四長即克昌嘉靖丙戌進士今為南京吏部驗封司正郎娶嚴氏繼娶徐氏皆贈封宜人次克明娶沈氏次克顯娶李

氏次克順郡庠生娶王氏孫女二毓莊適臨川主簿聞
孺毓繁適郡庠生潘一正曾孫男六曰魯曰哲曰曹曰
署曰香曰普曾孫女三尚幼君卒之明春同霍孺人塋
石屋鄉乾溪之原而未有誌後四十二年驗封君始具
狀屬予曰克昌生晚幸大父及見日者許克昌異時當
有成而大父手旋克昌頂曰望兒爾也茲克昌幸粗立
大父之言克昌曷敢忘惟是潛德未述懼遂泯泯也墓
石之文敢以瀆子予曰諾乃銘曰

惟德斯靜惟躁斯競人之所侮神之所聽厥或弗然天
者未定有孫奮庸實萃厥慶刻辭埋壚千古是訂



文簡集卷五十二

欽定四庫全書

集部

文簡集卷五十三至五

詳校官中書臣葉元符

中書臣劉源溥覆勘

總校官原任中允臣王燕緒

校對官修撰臣戴衢亨

謄錄監生臣張炳

欽定四庫全書

文簡集卷五十三

明 孫承恩 撰

墓誌銘

太子太保禮部尚書榮簡程齋盛公墓誌銘

嘉靖庚戌七月十五日致仕禮部尚書海陽程齋盛公卒明年公子瀚命其子按察副使若林具公行實遣族孫昌齡越七千里走都下丐公門人大司成午塘閔公

銓次為狀持過予請文其墓石予識公晚然筮仕入詞
林則固知東廣有厚德博學之士為公者而想見莫由
一親炙之嘉靖辛卯繆膺校文應天公時以南京太常
卿署篆南院始獲識公則見其敦龐和易藹然可親信
為巨人長者少慰夙昔而以匆迫未獲請益洎予還朝
辱公贈予雄文極荷教愛乃公身後之役寧敢以不文
辭乃為叙曰公諱端明字希道程齋其別號也生時頗
異考梧莊為仁化司訓生公於官廨先是以解散欲緝

夢一偉丈夫謂曰君緝解望勿傷予宅旦日發土有石刻曰宋端明殿學士程公墓梧莊瞿然亟掩之而公以是日生梧莊因名公曰端明公後亦遂以程齋為號少長穎悟絕出四歲誦孝經論語七歲能詩詞繼博覽經籍受詩於林公誌受易於蔡公清受書於陳公璣受春秋於歐陽公某皆得其精義而蔡尤器公為製字且為說以贈重有期許弘治壬子鄉試舉公第一人壬戌第進士授翰林院庶吉士以文學見重館閣諸公未幾丁

外艱歸服闋以母老久之未行會有閹人劉瑾者素不喜史館諸人乃以事中傷公竟坐免瑾後以逆誅詔起公授翰林院檢討時瑾雖敗而他閹尚橫政從中出兵冗財竭山東河南多盜邊塵屢驚士卒挫衄公欲具疏論建先陳書大學士西涯李公言多剴切大要謂今天下雖若治平而隱憂可畏如人一身舉動如常而脉已病久將不支宜及時圖為且諷西涯以首相不能匡救制伏中官無以副中外望宜避位去西涯感嘆改容謝

之於是他執政洎諸權貴皆有嫉公心無何公念母老再疏引疾以養母請歸三年太宜人日促公起公因乞補外以便養於是得浙江提學僉事先是督浙學者尚嚴刻以三等檢察士有司得行其私苛斥良俊士憤不平公至務行寬裕崇尚德化前所註誤被黜者試其業可進行不詭則者咸復之公恒言吾閱人以文而觀行每每得人故受公知者多為善士抵成就焉於是士論翕然服且愛戴如其親公日懷母不置復再疏乞養未

報而太宜人訃至奔喪歸士不忍釋追送多至出疆服闋陞南京尚寶司卿再陞左春坊左庶子兼翰林院侍讀充經筵講官故事講官進說多藉之以規切時政闕失後執政恐觸諱輒先竄定講官所著說遂以相沿祭酒儼山陸公深進說因面奏上以其輕率少不然之於是陸以慙去位至公進說亦不遵執政所更也臺諫希執政意劾公講時微咳為失儀復調為南京尚寶司卿九年陞南京右通政十年改陞南京太常寺卿十二年

陞南京都察院右副都御史初公督浙學時以東陽尹張某職多曠切責之至是而張為吏科都諫憶舊憾劾公非長憲才公遂免歸因卜築東山為終老之計絕不與世故相撓公嘗有夙疾一日得方士所製秋石服之良愈因令家人習其法後數製餌之既閒居益事攝養晚歲體更強健遠近多傳公有延生之術事頗聞於上一日諭元輔介溪嚴公貽書辟之來京復命吏部遣官齎金幣趣公馳驛赴公不敢辭既至陞禮部左侍郎

不煩以事專以備顧問賜牙圖書記令有言密識以進
因問攝生正傳公疏奏大要以清心寡慾為致養中和
之本上嘉納既而公以勞舊疾復作深居邸舍不與秋
毫人事中使存問咨訪日至三四公就床叩首謝後上
益優之多所慰諭賜公飛魚綺服其他賞賚不可枚舉
上嘗手製良藥賜公且諭曰北地寒甚晨服必減寒痛
一二眷公如此未幾公疾日甚二十四年春請假歸治
上允之命給驛以還既而即其家陞工部尚書且徵之

明年秋公至闕尋轉禮部尚書眷遇益隆既而疾復作
卧邸舍不能出乃復以疾告有詔去留隨卿公不敢再
疏間進萬年金鑑錄推明自古帝王祈天永命之要又
進永壽真詮但戒喜怒以致位育語多依經銜上嘉納
之無何加太子少保冬病浸劇復乞歸疏入不報公令
其孫治後事每上他疏輒於疏尾稱臣病不能終事陛
下顧恩深未敢言乞骸骨耳惟陛下哀憐之上感惻於
是允公致仕公年已八十矣抵家病益篤逾年而薨上

聞而悼之特為贈且謚謚蓋上親定云命有司營治冢墓遣中書舍人董塋事諭祭者三生榮死哀公可謂遭遇之隆而上之於公始終寵眷矣公體貌豐偉舉動舒徐孝友之德本於性成垂老遇先忌哀慕終日事異母姊如事母收育族之遺孤為畢婚娶樂施與每賙人之急若不及遠近故舊有需於公者應之無難晚年上所賞賚悉與諸故舊歸休之日篋中圖書數卷賜衣品服數襲而已公立心行已恒主於厚與人和而有禮不以

貴賤勢利高下其心雖田夫野老與之處油油然終日
鄉隣或有頑悖者則從容諭誨不為面斥故感化者多
教人恒以躬行為先每言曰性命之道乃生人本等率
性盡倫乃是人之身心事學問不過資益節文若以此
為聞望標幟則失其本矣又曰人而不知天人之學徒
營營然為名利充詘隕獲可乎家居嘗自製玉華巾為
野人之服因又自號玉華子逍遙塵外聲利紛華之誘
泊如也生平好學至老手不釋卷著述甚富有玉華子

二卷解道德經為老子真詮二卷纂緝自古帝王興衰之由為知微錄五十卷評騭歷代名賢為叩須錄十卷消息盈虛之際會意獨深詳見五行論蓋多所自得者又有醫抄兵抄緯抄數抄諸子抄共一千五百卷公之學可謂宏博矣其他詩文則有丁集十卷程齋類稿二十卷皆溫厚平正可傳蓋公以敦實簡靜之資而酷志問學老益勤懇博覽玄思是以養深積厚有如此庶幾大雅之士而彼有佻獩自負俊敏譎譎咕咕若易視公

者多不自量也予嘗見公於疇人中受人語侵若弗悟而弗與較予以是服其德量為不可及云盛之先系出汝南自漢廷尉吉至元海陽尹鵬中歷唐宋往往有顯仕者鵬則公七世祖也鵬長子某以內職調官儒學提舉卒於海陽次子岷遂占籍焉海陽之盛蓋自岷始岷生洪為五經院長洪生孚國初署海陽教諭孚生夔浙江餘杭主簿夔生鳳儀是為梧莊娶伍氏先司教仁化陞福建安溪教諭二任咸列名宦至今祠祀公之為工

部尚書也會覃太廟恩公例得封三代如其官而公退
歎不為請以故梧莊止仍其舊所贈秩為奉政大夫左
春坊左庶子兼翰林院侍讀母贈宜人乃俱不復加贈
而祖妣皆不及公之淡靜不急榮利多類此配許氏永
春司訓炯之女有懿德先公三十年卒贈恭人子一即
瀚廣西融縣知縣以獨子侍養早致仕女四長適郡庠
生丁倫以賢孝稱次適朱仲虎次適沈天裕俱庠生次
適余藏孫男三長即若林次若樹鄉進士次若果庠生

孫女三曾孫男一墓在某鄉之原擬某年某月日葬毅
齋孫子曰予嘗論人物於嶺表名世之士代有人焉若
唐之張文獻公九齡宋之余忠襄公靖皆以勛德顯著
後先相望至在清獻公與之挺然出二公之後實與相埒
若其高尚恬退去位之決朝廷虛揆席以待徵書六七
至不起世尤以是重之乃程齋公又後清獻二百餘年
生平宦業未必相同而晚歲被遇聖明柄用方切公懇
惻求退幾忤上意雖以老疾所迫而平生宦興之薄故

乞休之疏前後數十上則公之高致謂今之清獻不可
哉夫士之立身出處而已予論次公之事而有感故揭
其出處以繼清獻之後又以見上之所以用公與公之
所以事上者如此而凡庸言庸行細瑣之善特具其槩
而不及詳以獨昭公之大節致意於篇終并述以為銘
曰

猗歟盛公奮身文學筮仕詞林聲望卓犖慷慨論事政
瘳民艱謂我閩迂誰納予言仕廿餘年屢起屢躋曰何

以然淡於祿利中既通顯隨復歸鄉歲晚大遇受知聖
皇公善攝生老益强健上達帝聰帝用公眷徵書鄭重
起公於家任公保護祿位荐加帝曰咨爾爾其有道爾
凡有得其悉朕告枉詢屢問性與道真錫公圖記密札
細陳公拜稽首臣無異術保畬元神乃臣所得惟皇毓
德致中致和位育天地萬壽奚多祈天永命金鑑有錄
惟皇鑒臣區區芹曝帝心允契賚與頻仍公心抑畏若
弗克承帝眷孔隆公齡則暮懇疏求歸肝膽披露帝用

感惻公歸海濱夙夜歎歎莫報帝恩公心日勤公體日憊大限奄及公觀化去訃音上聞帝心悼傷卹典優渥公沒有光有隆者丘帝命所治文石孔堅刻我銘詩

嘉議大夫工部右侍郎雙橋蔣公墓誌銘

嘉靖辛丑五月廿六日少司空雙橋蔣公以疾卒於都城之寓先是公由浙藩布政使擢順天府尹順天徭役久弗平其他弊政猶多公視篆悉意咨訪特疏上四事曰議編審以均州縣曰議優免以恤凋憊曰議偏累以

阜邦畿曰議脩理以省民力上嘉納以次舉行時譽振
起甫七閱月有工部之命搢紳士方傾注冀公有為而
公雅有消渴疾以前積勞復然猶多所裨益沙河城慈
慶宮工畢有白金文綺之賜加俸一級乃庚子春病轉
劇三上疏乞休始得允瀕行遂以不起公諱淦字汝潔
雙橋其別號也廣西全州人曾祖某祖某皆不仕父某
以鄉舉授直隸池州府建德今年若干丁母憂去服闋
不忘哀慕遂不仕人高其誼後因公官布政使偕祖俱

贈如公官祖妣陶氏母伍氏俱贈太夫人公幼穎悟舉
止不凡弱冠務學才思溢發入郡庠前後督學者程其
藝必置優等丁卯領經魁鄉薦辛未登楊慎榜進士授
兵部車駕司主事即以清苦自持兩閱馬於宣府大同
居庸紫荆二關乙亥秋調武選司主事丁丑秋丁外艱
先是公官京師不獲時接建德君手書輒憂念既而得
例歸省九閱月而建德君故哀毀踰節閉門讀禮足不
及公府庚辰起復仍舊職甲申夏陞武庫司員外郎未

幾陞武選司郎中主選二次人服其公是歲冬補浙江
嚴州府知府興利革奸四境靜肅吏無招權民知向方
政暇則進弟子員於庭與辨論析經義歲課有不合者
親與改削今嚴士猶寶藏其筆迹巡訪使交薦之郡人
刻石記政丁亥春遭母憂哀毀致疾久始愈服闋復除
廣東惠州府知府政績視嚴誌郡者載公名宦癸巳冬
陞河南左叅政值歲侵公議策賑救巡撫簡公甚嘉
納之督運如京自公應毫髮無私焉洛中今傳為口碑

丙申陞廣東按察使巡按陳侍御稱其心行光明憲度
整靜辨冤獄懲貪暴三四事猶彰著人耳目戊戌春陞
江西右布政使時聖母梓宮南祔公以一身接應江州
不動聲色民不擾而事集甫一月擢浙江云公平生慎
操執每諭子弟曰他日決不敢挾重貲以過柳浦故食
無兼味衣無重帛世利紛華淡如也循循如書生無疾
言遽色與人交若恐不得當其意斷獄務平恕不以得
情為喜生平未嘗事請求中朝貴人無分毫外慕故末

年又號居易子云尤厚宗黨賙卹匱乏擇質美者教育之俾之有成有名棫名賁者俱領鄉薦好善垂老不倦嘗聯諸成語以自警曰為善最樂寡過未能又曰皆反求諸已不敢惡於人若公者可謂篤行君子矣公生於成化丁未十二月八日距卒得壽五十有五初配唐氏繼配舒氏俱贈夫人又李氏皆先公卒又繼配吳氏子一名櫬舒氏出女一適鄧壽箕側配張氏出公卒櫬將扶櫬歸葬於里之原欲文其墓中之石謂予公同年具

狀來謁不得辭也銘曰

輶車敦敦僕夫在門公喪曷歸萬里於南維公閭閻行
峻貌溫敷歷內外厥聲振振亦既顯庸而用弗究胡豐
其德而嗇其壽刻辭埋墟貽後弗朽

廣寧伯友松劉公墓誌銘

予頃聞京師有廣寧伯劉公者以貧約終廣寧多崇爵
厚祿何至是今年秋八月二十六日遘疾卒其嗣子允
中縗服持幣踵予門見藐然遺孤也出刑部陸主政穩

所具狀再拜乞予銘其墓中之石予未始識廣寧而憫其孤乃受狀發而讀之嘆曰嗟乎承世爵有如斯人者固不可銘哉廣寧之貧以清謹好義致死至無以給喪資則其貧為甚嗣子惇惇子立予不銘將誰謁銘乃返其幣據狀叙次曰廣寧伯諱泰字世亨別號友松其先淮陰人也始封公榮當高皇帝時從征累建奇績拜中軍都督府都督文皇帝時以平倭寇功封廣寧伯世襲公其五世孫也嘉靖癸未歲嗣歲隨奉命冊封趙藩等

藩克善厥事斂戢僕隸無敢肆擾遠近若不知有廣寧
伯者於是搢紳士俱稱廣寧伯賢南京控江上游寇出
沒無時竊肆標掠戊子歲公以推薦奉勅督操江事訓
練士卒振揚威武江寇殄息庚寅歲徵還提督團營戎
務京營操兵例以勛貴臣總其事然率寬縱少克盡職
士亦怠玩驕恣不然則掊剋取怨詈公前後被命提督
者四若三千練武神機五千等營持之以敬慎將之以
勤敏麾下嚴整每視事庭墀肅然左右無敢笑語然心

實仁恕體愛士卒故衆多歸心乃搢紳士稱廣寧伯得
統馭術神機營缺員大臣命推擬公首薦而天子亦知
公當六飛南巡議居守重臣御筆親定公署掌中府事
至是兵部疏公名上特俞可降勅獎勵多寵詞公感知
遇益勉圖自効鞠躬盡瘁不敢少事安逸於是搢紳士
稱廣寧伯忠勤能不負簡任未幾遘疾不起蓋終公之
世握兵符如一日云公性質嚴毅居室亦寡言笑與人
誠信每厭浮薄詡詡者之為服食安於簡素無侈靡習雖

讌會亦無豐設至事母則備洗腆調睦姻族婚喪費極力濟其不逮平生不解治生產故習於淡薄而至無以厚其終公生弘治庚戌十二月二十三日距卒得壽五十有八配楊氏封夫人側室馬氏張氏子一即允中馬氏出女四長適武靖伯趙國斌次適戚畹武學生沈望楊夫人出餘尚幼張氏馬氏出以某年月日葬於玉河鄉北辛安祖塋之次允中先嘗告哀於朝天子傷悼命有司議卹典至是命下諭祭者七贈太子少保聖恩隆

渥時議不以為過益信廣寧之當銘乃銘曰

國有貴臣勛閥之胄鍾鼎世殷亦分之有邈矣劉宗厥
聲隆宗剖符分封自其祖公伯子伯孫奕葉維世建茲
廣寧實績其緒廣寧維賢約已檢身率履儉素不殊儒
紳賙卹族黨曰是先澤吉凶是資靡專私殖門列榮戟
室無奢華逮茲易簣殮含弗加世爵如斯實歎其似我
第其行大節在此廣寧居官惟理之循使命潔已弗汙
纖塵長江巨防公徃鎮壓訓師振武江水怙怙桓桓禁

旅還公總戎當寧眷注僉言攸同奉公劬劬夙夜匪懈
義威仁撫士畏而戴不二心臣庶幾近之李廣不言天
下信之考終惟寧恤典有赫曷以詔後刻在墓石

姚處士并配李孺人合塋墓誌銘

毅齋孫子曰世衰道漓俗不知教學士大夫尠克善其
子而況女子婦人孟母之後僅一二數也予觀堯峰姚
子而重有感焉姚子山西潞安屯留人十五歲而喪父
賴母鞠育姚業素貧門祚單薄上下無所於藉母秉節

堅貞躬緝織以為衣食窮苦困阨篤志教子姚子業卒
有成舉嘉靖丁未進士為松江府節推姚子貌古朴無
文出語亦簡質少宛曲居官勵冰霜之節敦朴儉素惡
衣菲食而安之至治獄則黽黽若治已事審鞠時與罪
人酬訊言雜爾汝務得情實而廉潔之操雖販夫傭工
無不知者以是上下孚信獄用大治嗚呼予觀晉陶侃
吏潯陽以鮮遺母母拒不受曰無重吾憂崔元暉為軍
校員外母述所聞以戒曰人傳居官貧乏不能自存此

是好消息若裘馬輕肥坐食俸祿不能勉務忠清何以戴天履地未嘗不掩書而嘆二母之賢也姚子居官之廉固本於天性而亦豈非母教所成乎姚子來松嘗奉母與俱朝夕訓誨激勵多矣陶侃崔元暉後皆以功業顯為時名臣姚子異日所至詎可量也母氏之教不將益有徵耶姚子寓松未幾母微疾思歸其鄉姚子懇留弗可母瀕行姚子徒步扶輿以從母子涕泣哀感行路母歸而病作隨以訃聞姚子擗踊號慟匍匐奔赴以予

有塲屋之雅致書具狀求文刻石藏墓中且曰唐昔葬
父未有誌願併書之於是父喪且二十二年矣無所稽
其行實而獨記曰姚氏有諱欽者欽生永謙永謙生倫
倫則姚子之父也讀書務農生於成化丁酉卒於嘉靖
戊子之冬壽五十有二母為邑人李有才女生於成化
甲辰卒於嘉靖己酉十月十三日生二子長名唐即節
推次名虞女二長適劉衛次適徐永祿孫男三一龍一
夔一稷母葬以某年月日墳在闕之原予既以姚子

之請叙次為誌則又為合葬之銘銘曰

明時晦迹力田讀書弗發于躬維後之遺懿哉賢母早
孀勵志食貧教孤卒顯其世父善母節似古匪今清白
之守施於後人昭潛有銘刻在墓石佇有封章永荷皇
錫

文簡集卷五十三

欽定四庫全書

文簡集卷五十四

明 孫承恩 撰

墓誌銘

故南京禮部尚書顧文僖公墓誌銘

嗚呼此先尚書東江顧公墓也公塋已二十七年矣而墓中之石尚未有文蓋有待也予不佞與公有葭莩之誼往時鄉先達福建叅政薇菴任先生以學行師表一

時後進有外孫女實妻公而予先大母任夫人則薇菴女也世叙親好予昔髫年隨先君宦留都公適發解先君出予見公公試予對聯喜予可教洎予承乏詞林從公後辱公引掖又先妣王夫人之葬公實銘墓則公身後之役誠莫予宜而予比歲係於職邇蒙恩賜歸家居公之冢孫處州府同知應陽自官所遣其子承善具狀來請嗚呼予尚敢以老憊不文辭哉謹為叙曰公諱清字士廉別號東江學者稱為東江先生世居於華亭城

南古西湖之族曾祖文理祖顯號遺善父瓊號可閒皆
隱德不仕後以公貴祖父俱贈禮部右侍郎祖妣沈妣
陸俱贈淑人公生而穎異九歲從友蘭張先生受小學
過目成誦繼受詩於涇府長史恰菴任先生一見即竒
之字以甥女怡菴即薇菴孫也年十五謁張莊簡公公
以元老負重望即衣冠出見退語人曰大器也弱冠遊
縣庠與錢太史鶴灘先生福沈惟忻先生悅交最厚奮
志於學鑽研討論廣閱羣籍而業日進三人者藝皆頡

頽而公獨以沉實識者占其遠到尤為督學司馬公壘
所器重每期以公輔家本儒素值歲侵有常情所不堪
者而公安貧固守有富家欲結納公公書座右曰毋徇
物而為所溺毋狎物而為所乘自少立志已如此四試
不利而不少劉弘治壬子吳郡王文恪公主南畿試事
閱公文曰昔歐陽子謂當讓蘇子瞻一頭地斯人也我
固當讓矣遂薦為第一輿論允愜明年癸丑長沙李文
正公主會試公名第二廷試吳文肅公為掌卷官或欲

導公往見公辭曰昔人所謂呈身者吾媿之竟不往洎
吳得公卷極力贊美以九重字失提置二甲一人改翰
林庶吉士讀書中秘時傳文穆公與李文正公宗伯程
公敏政皆負文章重名慎許可公每試必在甲乙亟加歎
賞公與同年毛文簡公澄羅文莊公欽順汪宗伯俊又
每以名節自相砥礪十月授編脩與脩大明會典丙辰
己未連同考會試稱得人戊午秩滿進文林郎封父為
編脩母陸配張俱為孺人癸亥正月丁內艱三月以會

典成進侍讀正德初還朝與脩孝廟實錄書妖人李孜
省事焦公芳與彭文思公有隙欲誣其附以得進貽公
以風聞書公云據實直書史職也他不敢與聞焦不能
敘中官蔣琮誣逐臺諫涉歷既久章疏雜沓時逆瑾方
熾僉畏觸其黨莫敢涉筆公潜披精核盡載其實有嫌
而欲節畧者公不為動丁卯主南畿鄉試尋充經筵講
官前後進講義必稽古兼規諷時政辭旨剴直多所裨
益逆瑾竊柄朝士多屈意與交公抗不為禮鄉人張文

冕用事附和者皆至美官公絕不與通有言公肯枉一
刺即高位可致公叱曰吾足可輕動乎且吾但知做吾
官而已遑知其他戊辰十月丁外艱己巳五月實錄成
例當進秩瑾銜諸翰林素不加禮因矯詔追論會典事
以不諳政事為名降編脩尋調南京兵部車駕司員外
會憂不赴庚午八月瑾誅還侍讀辛未五月陞侍讀學
士兼脩玉牒甲戌主武舉考試乙亥掌院詔同內閣輔
臣照例考察上疏辭免不允九月有文綺之賜丙子四

月秩滿進奉直大夫加贈父為侍讀學士母陸為宜人
尋陞詹事府少詹事兼翰林院學士充經筵日講官丁
丑主考會試防範嚴肅校文崇雅黜浮得士為盛奉命
教庶吉士陶鎔造就一時出門下者若江右舒芬南廣
倫以訓建康陳沂貴溪汪佃西安許宗魯闕中馬文簡
汝驥至今稱為一代名流又嘗教內書堂不結生徒不
使與子弟相接嘗曰此輩如穢物遠之猶恐其汚况近
之也餘姚謝文正公每稱其臨事有守以此時儲位尚

虛公疏請預定不報武宗數巡幸公屢疏請迴鑾言甚切是歲六月陞禮部右侍郎與宗伯毛文簡公協心秉正會郊祀且近而駕猶未還公草疏數百言上之上亦為感動秩滿進階通議大夫贈及再世如其官廕一孫入監讀書時宸濠既獲武宗駐蹕通州江彬在側人情洶洶內閣會議疏請班師辛巳武宗崩今上入繼大統復會議迎駕冊立勸進頒詔易服臨喪諸吉凶大禮公援古証今折衷群言時以公所議為得體從公居多公

時譽望日起僉謂旦夕爰立而有忌公欲傾之者噬臺
諫撫他人事誣公不根特甚衆論囂然內閣亦持之不
下而公從容鎮靜因詔例自引退無少疑濡一時皆為
公不平王文恪公方家居因作風聞論以雪之論一出
而輿論益定于是南北臺諫程英朱洸等四十餘人并
撫巡各上章論薦上乃起公南京禮部右侍郎公既歸
自喜甚適絕意仕進不謂復有簡命不得已之任兩疏
乞歸不允時望方屬公漸次柄用而公歸志已決疏益

懇是秋得俞旨有歷事先朝講讀年久多効勤勞既病
篤懇辭陞南京禮部尚書致仕先是公以進徽號賀表
上京師至東昌聞命有勸公謀以代進者公曰清被皇
上渥恩得遂私請今一事不終豈人臣之義乎時已力
疾猶云縱不能覲天顏得一拜闕門為幸乃抵德州輿
疾而進卒于河間府瀛海驛戊子閏十月二十九日也
公疾革時知府牛天麟問以家事曰無以問也吾表安
在謹護之牛深嘆其忠勤始終敬畏不亂公之出處之

緊如此毅齋子曰曩予嘗侍教於故文僖公京口靳戒
菴先生泛論文章家而及公戒菴曰東江製作之盛不
必言其經濟可重也予時嘆戒菴之服善退而求公之
所謂經濟者則如狀所具論水患加稅助役諸書明暢
剴切曲盡事理鑿鑿可行予是以益服公抱負之實可
用之才若得大柄而盡其用則建立當何如而奈之何
不然也公之沒也予嘗祭以文曰名位雖顯鈞軸未歸
平生抱負百不一售昌黎用而不相歐陽相而弗久及

惜公之歸也云間裴丞於綠野老溫公於獨樂洎述公之復起也云泉石盟存莫遏裴丞之欲去龍蛇歲值隨嗟溫公之長逝蓋深惜公之不盡其用而所以致公去位者豈得不痛恨于斯人哉嗚呼公稟篤實之資厲廉靖之操尚恬淡之行持畏敬之心每聞後生輩浮誕邪辟事輒痛詈而深斥之若不欲聞於耳者則言者所論正公所惡而何有毫髮于公蓋有其人矣而非公也言者不察公何如人而乃妄加之豈不冤哉而浮言所起

則必有由矣然識者豈信之泊公道昭明聖心開悟賜
環今日之論竟何如哉承善之乞銘也予適患足疾又
有倭患之警伏暑中草草綴錄念公善美未易一二數
而獨謂其出處昭揭無疵者不可不詳是以特先致意
屢言不厭若其行誼狀所載甚悉則具采錄以盡公一
生云初公以無故去位而處之甚泰夷然無毫髮怨尤
憾跼之意方且建義塾以淑後進緝譜牒以示族黨閉
門課諸孫學業樓居端坐終日不知有人暇則與諸親

故從容詩酒為樂直躬自信自少至老與人一以誠論
事侃侃不少貶非其人不與言可與言惟恐不盡已意
至立朝當事王章國休鑿鑿具有根據若所著廟制服
制私議諸皆可類推平生事皆實歷其言雖數十年不
變一字凡事精思敏到即始要終如指諸掌也恬于進
取以退步為消謗忌長策不因遲速動意最受知李文
正公間嘗表于公曰清在門下惟當退一步文正悵然
曰誰肯道此初轉學士有沮之者梁文康公曰他人且

及渠已後若更遲之如公論何後五年學士而亦漠然
故文正有始知衣鉢是家風之句蓋其高情雅志不汲
汲于顯貴至於膺被誣謗危禍且及而亦不動心其量
度過人遠矣孝友篤至祖遺善翁卒治塋經營艱苦始
克畢事後每語及輒泣下曰那得今日容易也喪祭必
準禮建祠堂以祀四世朔望率子孫拜謁伏臘致敬遇
忌日感泣不食終日時物未薦不敢入口嘗脩治塋域
日必躬詣事從父如父撫弟諸孤如子伯祖無後附享

不衰尤軫念少時事並祀友蘭怡菴二師于塾歲上元
率兩家子弟祭獻之故舊有行誼如顧東曙饋遺不輟
至于教子孫力田為善諄諄恐後老不廢學日挾一冊
以從若飲食然治家嚴而有法雖細務皆有規畫家衆
必委之生理不使生異念嘗謂人曰人看聖賢太高故
畏而不敢為然本無異要在自立耳又言人便亨達終
不可失了秀才氣味習勤事事必終勸之少逸即咈然
曰事畢乃逸舍而求間祇益忙耳自今思之是皆吾輩

之所犯公誠前輩老成所語皆格言也至于自奉淡薄又不喜聲色曰非惡之也但不覺入耳蓋其簡淡朴實生於性成不事表暴詐偽如此迹公為人則誣公之言豈公邪予是以重為公惜重為不平重有憾於斯人也公少精經術多所心得其應試時義及文場所梓程式至今膾炙人口既出仕念民間利病莫與疏處郡舊有志猥瑣不倫為重加纂葺遂成一代故典松苦役稅繁重民力不堪辯証差舛搜剔蠹源當時獲免糧數十餘

萬石人至今德之晚見習俗日異圖所以闡前脩表後
進者為雲間文獻集與傍秋亭日記皆未就所為古文
深厚爾雅不事浮艷竒怪出入韓柳詩宗盛唐多思致
詮次所著號東江家藏集四十三卷續集五卷存稿十
卷及松江府志三十二卷華亭顧氏家譜四卷校正三
事忠告周文襄公年譜俱行於世其編校許魯齋遺書
元張文忠公集未行公生於天順庚辰正月二十三日
距卒得壽六十有九配張淑人即怡菴甥有懿德載公

所自為志側室褚氏子男六人長天彝前公四年卒以
子應暘承公廕贈順天府通判娶嚴氏封太安人次天
叙早卒次天秩國子生後公二十七年卒娶李繼祿女
四人皆先卒張淑人出次夢熊夢得夢錦俱夭褚氏出
孫男十人即應暘由都察院檢校南京太僕寺寺丞今
為處州府同知次應寅國子生應辰廣西桂林府照磨
應雲應錄應芝應昌應明應金應泉天女九人長適金
山衛指揮同知侯乾次適按察司副使張祚曾孫府學

生約次適國子生范氏彝子啓高次適都事曹鏐子光
祿署丞梁次適主簿董應登子學次適贈主事楊雲孫
國子生秉介次適大理寺少卿董恬子國子生宜陽次
適知事楊雲鶴子子貞次適按察司副使富好禮子縣
學生于仁曾孫男幾人承慶承善俱國子生承餘承蔭
承緒承讓承闕 曾孫女闕 人俱適士族玄孫男闕

人女闕

人先是公嘗戒子曰吾無補於時即死慎毋

陳乞恤典以重吾過子奉命惟謹公卒之三年督學章

公衮并巡按魏公有本從庠校羣議奉公如祀鄉賢復
疏聞于朝下部議會令大學士嚴公為宗伯具復得俞
旨賜祭塋如制謚文僖恩禮渥矣公生平於陰陽家方
隅禁忌等頗不信每語人曰天道常與善人豈有廣布
諸凶殺不論善惡邪正緊使觸之遂降以禍乎必不然
也人不自力為善乃專聽信術家之言茲惑矣其守道
不惑如此今城北祥澤之地公所自卜也以嘉靖丙辰
月日納文隧中銘曰

聖賢用世惟其具有不盡然係所遇猗歟東江用則沛
用而弗究理莫喻惟公之生實間氣峯泖之英稟則異
德學才猷人尠媲雄鳴高騫驚海寓鳳閣鸞坡日容與
公有長材志經濟詞翰文章乃餘事帝曰汝賢汝予毗
朕有大柄遲汝畀公拜稽首承若懼臣供臣職敢弗至
佐貳容臺掌邦制百僚欽欽服崇議聲光昭回世傾企
泰山之雲霓而霽大惠旁施作甘澍飄風何來洎之去
生平蘊蓄百不試惟賢知賢道相濟豈伊蕙猶不同器

宣父大聖晏嬰尼賢弗知賢命之際浚也何忌沆鼎蹟
公弗盡用曷所致道有通塞有明晦凝然泰然見強毅
日再中天廓霧曠天者卒定群喙廢帝命再承臣敢替
恩榮不虧始終義出處大節公無媿完璧歸全靡瑕類
祥澤之原厥土埇公歸其中坎深邃公神豈云同物敝
劍氣玉光不得秘草木林巒藉光賁我銘弗文惟直致
來者有徵裨信史

河東鹽運司判官前尚寶司司丞兼翰林院五

經博士董朗洲墓誌銘

董子朗洲判河東鹽運司之三年為嘉靖戊申四月廿四日以疾卒明年其子懋延將治塋事持奉化尹徐子伯臣狀謁余銘董之先與余宗俱汴人從宋南渡來松世有姻婭董子自少以諸生事余洎舉進士登仕籍余適在朝相與殊厚董子仕漸達矣忽得外補去余力不能振起之方日念焉乃遽大故也悲夫董子才性敏慧強問學能文章為當道者所知與由刑部浙江司主事

改禮部儀制司未幾選入內閣典制誥遷尚寶司司丞
兼翰林院五經博士與史館校錄令上崇事立典凡祈
報章詞內閣所進多出董子非董子製則弗稱以故諸
老爭欲致之門下董子苦於酬應勤日夜弗休雖隆寒
盛暑或值病亦不得自解釋緩急不能人人悉如意於
是愛憎易生而其同事者顧謂其矜能自銜也從而妒
之又諸同事者類多雜流董子以名進士翹然處其中
居常吐論侃侃不少附和人於是嫉惡者叢至而謗刺

行矣其補河東也鹽司權利之所忌者謂董子居官貧
薄或可移易其志而敗其平生而董子操持愈勵方且
閉門修業鹽司者亦雅知其人不責以職守常務約黷
校士數百輩俾侍董子講究經義董子復和易明坦與
多士切劘懇至多士愛附監司益禮重之具薦牒有持
正甘澹泊之許愛董子者謂且復召還而當道意靡同
忌者惟恐其來軋已也多方阻抑有矣寧肯援手出一
語者乃至一墮不復天乎人邪夫才性如董子少自貶

損與時和同崇秩厚祿當不難致而董子寧矯子以自
取困落莫如此乃至死無以治後事監司命給於官識
者尤深悼惜之斯益可以得其為人矣余讀徐子狀殊
覩縷不能悉特以目擊與所知具列焉董子諱子儀字
羽吉別號朗洲高祖思忠曾祖以和祖經父龍號南田
為鄉善士封刑部主事母喬氏有賢德贈安人娶黃氏
封安人子三長即懋延孝而好學能肖其父娶大叅宋
樗菴孫女次馭延塲次戩延女二適鄉進士周頌早卒

次幼孫男傳洙女二董子生於弘治壬戌正月二十二日距卒僅四十有七墓以己酉十二月十五日墳在俞塘之南原銘曰

嗚呼朗洲人患無才而亦或以才累人苦情廢而亦或以勤毀惟子潔修志行邁流忌子者仇子則何咎壽命弗長匪天誰尤嗚呼朗洲攬華弗食實竟何為哉

太學生蘆江姚君墓誌銘

太學生姚君運之既卒之明年戊午其子體信以正月

五日葬君於野橋水字圩之新阡先事奉其姻友禮部
郎中陸君元晉狀詣予請銘予雅聞君賢而又質諸陸
郎中之言當不誣乃按狀而書之君諱籌字運之別號
蘆江先世居浙之海鹽宣德間高祖秀一徙廣陳宗憲
徙黃圩始占籍平湖曾祖奇祖璋娶華亭張氏張本著
姓遂因家焉世有隱德至父中山君井倜儻尚俠多結
納四方賢豪長者益拓其家君中山長子也少穎異中
山固心奇之君亦自負卓犖思以青雲自致治毛氏詩

心好之日夜誦說不懈弱冠補邑庠弟子員禮賢擇友
究心問學凡子史百家靡不研究若文獻通考大學衍
義補諸書讀者多苦其浩瀚君勾摘玄要手錄成帙他
多類是學用以成督學較藝每先諸生名起膠庠間屢
蹶場屋外舅侍御玉洲陸公重惜之勸補太學生祭酒
涇野呂先生閱其文亟稱之曰此博雅不凡之士也由
是名益起六館及歸省時中山抱病簡出家務叢委君
獨任之勅童奴勿得闕白以貽父憂父歿哀毀踰禮克

敦襄事不愆於度君性本孝友先是母張孺人卒每懷
風木之思至是惟生母宋孺人以高年在堂遂不復有
仕進意竭情甘旨每食必嘗而後進屬寇亂避徙無寧
居君旦暮不離母側孺人安之未幾孺人嬰疾卒君朝
夕擗踊哀毀骨立哭之如中山處諸弟多友愛終無間
言人尤以為難云君風儀俊偉襟度蕭灑雖值兵荒困
於繁役家用中落人所不堪而君處之夷然嘗曰人生
貴適意耳他何足慕哉性復坦夷任真犯而不校與人

交曲敦契誼晚雖嬰足疾於慶弔必親往以成禮論事
無所詭隨而剖析理道臧否人物必歸于當尤好賓客
喜飲酒雖處窮約供具精腆笑談尊俎殆忘其為貧也
君既家居篤意教子克殫心力而進士復英爽不羣善
承君教竟哀然藝林連取科甲以起莫不謂君厚德之
報而君遘疾既彌留遺命其子曰立朝忠義居家孝友
吾目瞑矣言訖而逝寔嘉靖丁巳三月二十一日也距
生于正德丁卯三月十一日春秋五十有一配陸氏即

侍御琳女子男二人長即體信丙辰進士觀禮部政娶
陸氏翰林孔自集女次體倫繼弟荃後聘顧氏福建運
使霑女女二人長適平湖庠生陸光宅即郎中季子次
許聘黃道中太學生尚賢子孫男二人長士麟聘馮侍
御恩子學可女次士鳳聘庠生顧思節女姚氏介兩邑
之間久稱巨族諸伯從多以科目起家通名仕籍君獨
抱藝弗售而鄉中稱善士必歸之乃今果有進士君者
為之子以亢厥宗以成君志其亦可無憾也已為之銘

曰

猗嗟姚君洵美而仁懋學孔勤蹕發於文志凌風雲惜
命弗伸畀我嗣人鬱其新原土厚而培瘞玉埋馨嗟嗟
姚君嗟嗟姚君

文簡集卷五十四